

ივანე ჯავახიშვილის სახელობის თბილისის სახელმწიფო უნივერსიტეტის ზუსტ და საბუნებისმეტყველო მეცნიერებების ფაკულტეტის საბჭოს 2018 წლის 11 ივნისის სხდომის

### ოქმი N 9

ივანე ჯავახიშვილის სახელობის თბილისის სახელმწიფო უნივერსიტეტში 2018 წლის 11 ივნისს შედგა თსუ ზუსტ და საბუნებისმეტყველო მეცნიერებათა ფაკულტეტის საბჭოს სხდომა.

სხდომა გახსნა ზუსტ და საბუნებისმეტყველო მეცნიერებათა ფაკულტეტის საბჭოს თავმჯდომარემ, ასოცირებულმა პროფესორმა რამაზ ხომერიკმა.

ფაკულტეტის საბჭოს შემადგენლობაშია 40 წევრი, სხდომას ესწრებოდა 27. კვორუმი შედგა, სხდომა გახსნილად გამოცხადდა.

#### დღის წესრიგი:

1. ცვლილებები ფაკულტეტის დებულებაში
2. ცვლილებები საგანმანათლებლო პროგრამებში
3. მიმდინარე საკითხები.

**1. მოისმინეს:** დღის წესრიგის პირველი საკითხი - ცვლილებები ფაკულტეტის დებულებაში. ფაკულტეტის საბჭოს თავმჯდომარემ, ასოცირებულმა პროფესორმა რამაზ ხომერიკმა საბჭოს წევრებს შეახსენა, რომ ახალი რეგულაციების შესაბამისად უნდა გავაუქმოთ სადისერტაციო საბჭოები და შევქმნათ ახალი მუდმივმოქმედი დარგობრივი კომისიები. გარდა ამისა, ფაკულტეტის დებულებაში შესატანია კიდევ რამოდენიმე ცვლილება ამ საკითხთან დაკავშირებით.

**აზრი გამოთქვას:** პროფესორი მ.ხაჩიძე დაინტერესდა რამდენად ეთანხმება ხარისხის მინიჭების წესი განათლების კანონს, ხოლო პროფესორმა თ.ლეჟავამ კიდევ ერთხელ მოითხოვა ხარისხის მინიჭების პროცედურის ახსნა. ფაკულტეტის საბჭოს თავმჯდომარემ, ასოცირებულმა პროფესორმა რ.ხომერიკმა უპასუხა, რომ ხარისხის მინიჭების გარდა მთელი ფუნქციები იქნება მუდმივმოქმედი დარგობრივი კომისიის პრეროგატივა. ხარისხს მიანიჭებს საუნივერსიტეტო სადისერტაციო საბჭო სხდომაზე, რომელსაც ასევე დაესწრებიან დარგობრივი კომისიის წარმომადგენლები. აზრი გამოთქვას პროფესორებმა გ.ღვედაშვილმა, ნ.შათაშვილმა, ნ.დორეულმა, თ.ლეჟავამ. საბჭოს წევრთა შეხედულებები გაიყო. ნაწილი კვლავ წუხდა იმის შესახებ, რომ საუნივერსიტეტო სადისერტაციო საბჭოში სრულად ვერ იქნებოდა ყველა დარგი წარმოდგენილი.

ფაკულტეტის საბჭოს თავმჯდომარემ კენჭი უყარა ფაკულტეტის დებულებაში შესატან ცვლილებებს (იხ. დანართი 1).

ჩატარდა კენჭისყრა.

**კენჭისყრის შედეგები:** მომხრე - 18, წინააღმდეგი - 5, თავი შეიკავა - 4.

**დაადგინეს:** შევიდეს შემდეგი ცვლილებები სსიპ - ივანე ჯავახიშვილის სახელობის თბილისის სახელმწიფო უნივერსიტეტის წარმომადგენლობითი საბჭოს 2016 წლის 23 დეკემბრის N9 სხდომის ოქმით დამტკიცებული ზუსტ და საბუნებისმეტყველო მეცნიერებათა ფაკულტეტის დებულებაში:

**1. დებულების მე-7 მუხლის პირველი პუნქტის „ე“ ქვეპუნქტი ჩამოყალიბდეს შემდეგი რედაქციით:**

„ე) უნივერსიტეტის ფაკულტეტების საბჭოებსა და უნივერსიტეტის დამოუკიდებელი სამეცნიერო-კვლევითი ერთეულებთან ერთობლივად უნივერსიტეტის აკადემიურ საბჭოს წარუდგენს საუნივერსიტეტო სადისერტაციო საბჭოს დებულებას, რომელიც ასევე მოიცავს სადისერტაციო საბჭოს შედგენისა და მისი თავმჯდომარის არჩევის წესს;“.

**2. დებულების მე-7 მუხლის პირველი პუნქტის „ე“ ქვეპუნქტის შემდეგ დაემატოს შემდეგი შინაარსის ე<sup>1</sup>-ე<sup>4</sup> ქვეპუნქტები:**

„ე<sup>1</sup>) შეიმუშავებს დოქტორანტურის დებულებას და დასამტკიცებლად წარუდგენს თსუ აკადემიურ საბჭოს;

ე<sup>2</sup>) ამტკიცებს დოქტორანტურაში მიღებისას დოქტორანტობის კანდიდატის შეფასების კრიტერიუმებს;

ე<sup>3</sup>) დეპარტამენტის წარდგინებით ამტკიცებს სადისერტაციო მუდმივმოქმედ დარგობრივ კომისიას, მის თავმჯდომარეს და მდივანს;

ე<sup>4</sup>) სადისერტაციო მუდმივმოქმედი დარგობრივი კომისიის წარდგინებით ამტკიცებს დოქტორანტის ხელმძღვანელსა და სადისერტაციო ნაშრომის სათაურს;“.

**3. დებულების მე-7 მუხლის პირველი პუნქტის „ჟ“ ქვეპუნქტი ჩამოყალიბდეს შემდეგი რედაქციით:**

„ჟ<sup>3</sup>) ფაკულტეტის საბჭოს გადაწყვეტილებით იქმნება საატესტაციო კომისია, რომელიც იღებს გადაწყვეტილებას ბაკალავრის/მაგისტრის აკადემიური ხარისხის მინიჭების თაობაზე;“.

**4. დებულების მე-11 მუხლს მე-3 პუნქტის შემდეგ დაემატოს შემდეგი შინაარსის „პ“ პუნქტი:**

„პ<sup>1</sup>. დეკანი სადისერტაციო მუდმივმოქმედ დარგობრივ კომისიასთან კონსულტაციით განსაზღვრავს სადისერტაციო ნაშრომის დაცვის კომისიის შემადგენლობას და დასამტკიცებლად წარუდგენს საუნივერსიტეტო სადისერტაციო საბჭოს.“

**5. დებულების V თავის სათაური ჩამოყალიბდეს შემდეგი რედაქციით:**

„თავი V  
ფაკულტეტის სადისერტაციო მუდმივმოქმედი დარგობრივი კომისიები“

**6. დებულების მე-18 მუხლი ჩამოყალიბდეს შემდეგი რედაქციით:**

**„მუხლი 18. ფაკულტეტის სადისერტაციო მუდმივმოქმედი დარგობრივი კომისიების სტატუსი და არჩევა**

1. ფაკულტეტის სადისერტაციო მუდმივმოქმედი დარგობრივი კომისია წარმოადგენს მუდმივმოქმედ ორგანოს, რომელსაც ფაკულტეტის საბჭოს გადაწყვეტილებით დელეგირებული აქვს სსიპ-ივანე ჯავახიშვილის სახელობის თბილისის სახელმწიფო უნივერსიტეტის საუნივერსიტეტო საბჭოს დებულებით ფაკულტეტის საბჭოსთვის გათვალისწინებული უფლებამოსილებები, გარდა აღნიშნული დებულების მე-2 მუხლის მე-2 პუნქტით განსაზღვრული უფლებამოსილებისა.

2. სადისერტაციო მუდმივმოქმედ დარგობრივ კომისიას დეპარტამენტის წარდგინების საფუძველზე ამტკიცებს ფაკულტეტის საბჭო.

3. ფაკულტეტის სადისერტაციო მუდმივმოქმედი დარგობრივი კომისიები შედგება დოქტორის აკადემიური ხარისხის მქონე შესაბამისი დარგის/სპეციალობის პროფესორებისა და

ასოცირებული პროფესორებისაგან. თუკი დარგის/სპეციალობის პროფესორების და ასოცირებული პროფესორების საერთო რიცხვი 5-ზე ნაკლებია, სადისერტაციო მუდმივმოქმედი დარგობრივი კომისიის შემადგენლობა შეიძლება შეივსოს მოწვეული წევრებით. სადისერტაციო მუდმივმოქმედი დარგობრივი კომისიის მოწვეული წევრი უნდა იყოს შესაბამისი დარგის/სპეციალობის მეცნიერი, რომელსაც გააჩნია დოქტორის აკადემიური ხარისხი და შესაბამისი დარგის სამეცნიერო ნაშრომები, რომელთაგან ერთი მაინც გამოქვეყნებულია დადებითი "იმპაქტ ფაქტორის" (ISI Web of Knowledge კლასიფიკატორის მიხედვით) მქონე ჟურნალში.

6. სადისერტაციო მუდმივმოქმედი დარგობრივი კომისიებს ჰყავთ თავმჯდომარე და მდივანი, რომლებიც აირჩევიან კომისიის შემადგენლობიდან კომისიის პირველ სხდომაზე. სადისერტაციო მუდმივმოქმედი დარგობრივი კომისიის წევრები ირჩევენ კომისიის თავმჯდომარეს 3 წლის ვადით, წევრთა საერთო რაოდენობის უმრავლესობით. ერთი და იგივე პირი თავმჯდომარედ შეიძლება არჩეულ იქნეს ზედიზედ მხოლოდ ორჯერ. სადისერტაციო მუდმივმოქმედი დარგობრივი კომისიის თავმჯდომარეს ამტკიცებს ფაკულტეტის საბჭო. სადისერტაციო მუდმივმოქმედი დარგობრივი კომისიის მდივანს სადისერტაციო საბჭოს შემადგენლობიდან წარადგენს თავმჯდომარე და ამტკიცებს ფაკულტეტის საბჭო 3 წლის ვადით. ერთი და იგივე პირი სადისერტაციო მუდმივმოქმედი დარგობრივი კომისიის მდივანად შეიძლება არჩეულ იქნეს ზედიზედ მხოლოდ ორჯერ.

#### 7. დებულებას მე-18 მუხლის შემდეგ დაემატოს შემდეგი შინაარსის 18<sup>1</sup>-18<sup>2</sup> მუხლები

„მუხლი 18<sup>1</sup>. ფაკულტეტის სადისერტაციო მუდმივმოქმედი დარგობრივი კომისიის მუშაობის წესი

1. ფაკულტეტის სადისერტაციო მუდმივმოქმედი დარგობრივი კომისიები თავის საქმიანობას წარმართავენ საქართველოს კანონმდებლობით, თსუ-ს წესდებით, საუნივერსიტეტო სადისერტაციო საბჭოსა და ფაკულტეტის დოქტორანტურის დებულებების შესაბამისად.
2. სადისერტაციო მუდმივმოქმედი დარგობრივი კომისია გადაწყვეტილებას იღებს სხდომაზე. სხდომა გადაწყვეტილებაუნარიანია, თუ მას ესწრება წევრთა საერთო რაოდენობის ნახევარზე მეტი. გადაწყვეტილება მიიღება დამსწრეთა ხმების სულ მცირე 2/3-ით.
3. სადისერტაციო მუდმივმოქმედი დარგობრივი კომისიის სხდომის მიმდინარეობა აისახება ოქმში, რომელსაც ხელს აწერენ კომისიის თავმჯდომარე და მდივანი.

მუხლი 18<sup>2</sup>. ფაკულტეტის სადისერტაციო მუდმივმოქმედი დარგობრივი კომისიის უფლებამოსილებები

1. სადისერტაციო მუდმივმოქმედი დარგობრივი კომისია სადოქტორო პროგრამის ხელმძღვანელის წარდგინებით განიხილავს დოქტორანტის სადისერტაციო ნაშრომის თემას, სამეცნიერო ხელმძღვანელის კანდიდატურას და დასამტკიცებლად წარუდგენს ფაკულტეტის საბჭოს.
2. სადისერტაციო მუდმივმოქმედი დარგობრივი კომისია განიხილავს სადისერტაციო ნაშრომის შემფასებლების კანდიდატურებს და დასამტკიცებლად წარუდგენს საუნივერსიტეტო სადისერტაციო საბჭოს.
3. სადისერტაციო მუდმივმოქმედი დარგობრივი კომისია სადისერტაციო ნაშრომის დაცვის კომისიასთან შეთანხმებით შეარჩევს დაცვის სავარაუდო თარიღს და დასამტკიცებლად წარუდგენს საუნივერსიტეტო სადისერტაციო საბჭოს.
5. სადისერტაციო მუდმივმოქმედი დარგობრივი კომისიის საქმიანობის სხვა დეტალები განისაზღვრება ფაკულტეტის დოქტორანტურის დებულებით.
6. სადისერტაციო მუდმივმოქმედი დარგობრივი კომისია ან/და სადისერტაციო ნაშრომის დაცვის კომისია (როგორც წესი კომისიის თავმჯდომარისა და მდივნის სახით) ესწრება საუნივერსიტეტო სადისერტაციო საბჭოს სხდომას აღნიშნულ დარგში დოქტორის ხარისხის მინიჭებისას.“

#### 8. დებულების 27-ე მუხლი ჩამოყალიბდეს შემდეგი რედაქციით:

## მუხლი 27. საგანმანათლებლო პროგრამების შემუშავება, განხილვა და დამტკიცება

1. საგანმანათლებლო პროგრამის შემუშავების, განხილვისა და დამტკიცებასთან დაკავშირებული პროცედურული საკითხები განისაზღვრება საგანმანათლებლო პროგრამის დაგეგმვის, შემუშავებისა და განვითარების ინსტრუქციით, რომელიც მტკიცდება უნივერსიტეტის აკადემიური საბჭოს შესაბამისი დადგენილებით.

### 9. დებულების მე-40 მუხლის მე-19 პუნქტი ჩამოყალიბდეს შემდეგი რედაქციით:

19. დოქტორანტობის კანდიდატი უცხო ენის გამოცდის ჩაბარების შემთხვევაში გადის გასაუბრებას ფაკულტეტის საბჭოს მიერ შექმნილ კომისიასთან ან შესაბამისი დარგის სადიერტაციო მუდმივმოქმედ დარგობრივ კომისიასთან. თუკი შესაბამისი სადოქტორო პროგრამა ითვალისწინებს მისაღებ გამოცდას სპეციალობაში დოქტორანტი აბარებს გამოცდას დადგენილი წესით.

### 10. დებულების XIII თავი ამოღებულ იქნას.

2. მოისმინეს: დღის წესრიგის მეორე საკითხი - ცვლილებები საგანმანათლებლო პროგრამებში. საკითხთან დაკავშირებით ისაუბრა ფაკულტეტის ხარისხის უზრუნველყოფის სამსახურის უფროსმა, ასოცირებულმა პროფესორმა მაგდა ალანამ. მან საბჭოს წევრებს გააცნო საგანმანათლებლო პროგრამებში შესატანი ცვლილებები. ცვლილებები ეხებოდა გეოლოგიის საბაკალავრო და სადოქტორო პროგრამებს და ინფორმაციული ტექნოლოგიებისა და ფუნდამენტური ფიზიკის სამაგისტრო პროგრამებს (იხ. დანართი 2).

ფაკულტეტის საბჭოს თავმჯდომარემ კენჭისყრაზე დააყენა წარმოდგენილი ცვლილებები.

კენჭისყრის შედეგები: მომხრე - 27, წინააღმდეგი - 0, თავი შეიკავა - 0.

დაადგინეს: შევიდეს წარმოდგენილი ცვლილებები გეოლოგიის საბაკალავრო და სადოქტორო პროგრამებში და ინფორმაციული ტექნოლოგიებისა და ფუნდამენტური ფიზიკის სამაგისტრო პროგრამები (იხ. დანართი 2).

3. მოისმინეს: დღის წესრიგის მესამე - მიმდინარე საკითხები. აქ განსახილველად გამოტანილი იყო სამი საკითხი:

- ა) ნახევარგამტართა ფიზიკის ს/კ ინსტიტუტში ერთი თანამშრომლის დამატების შესახებ;
- ბ) სამაგისტრო და საბაკალავრო ნაშრომების თემების დამტკიცება;
- გ) საინფორმაციო-საკომუნიკაციო ტექნოლოგიების განვითარების საფაკულტეტო ცენტრის შექმნის შესახებ.

- ა) ფაკულტეტის დეკანის მოადგილემ, ასოცირებულმა პროფესორმა თამარ ჭელიძემ საბჭოს წევრებს გააცნო ნახევარგამტართა ფიზიკის ს/კ ინსტიტუტის დირექტორის პროფ. შ.მირიანაშვილის განცხადება (იხ. დანართი 3.1), სადაც იგი ითხოვდა ინსტიტუტის ნახევარგამტართა მასალათმცოდნეობის განყოფილებაში მეცნიერ-თანამშრომლის თანამდებობაზე ენდი თუმანიშვილის დანიშვნას (ანაზღაურების გარეშე) ერთი წლის ვადით.

საბჭოს თავმჯდომარემ კენჭი უყარა აღნიშნულ საკითხს.

**კენჭისყრის შედეგები:** მომხრე - 27, წინააღმდეგი - 0, თავი შეიკავა - 0.

**დაადგინეს:** აღიძრას შუამდგომლობა თსუ ადმინისტრაციის წინაშე, რათა ნახევარგამტართა ფიზიკის ს/კ ინსტიტუტის ნახევარგამტართა მასალათმცოდნეობის განყოფილებაში მეცნიერ-თანამშრომლის თანამდებობაზე დაინიშნოს ენდი თუმანიშვილი (ანაზღაურების გარეშე) ერთი წლის ვადით.

ბ) ფაკულტეტის დეკანის მოადგილემ, ასოცირებულმა პროფესორმა თამარ ჭელიძემ საბჭოს წევრებს დასამტკიცებლად წარუდგინა ქიმიის, ბიოლოგიის და გეოლოგიის დეპარტამენტებიდან წარმოდგენილი სამაგისტრო და საბაკალავრო ნაშრომების თეზები (იხ. დანართი 3.2).

საბჭოს თავმჯდომარემ კენჭი უყარა წარმოდგენილი თემების დამტკიცებას.

**კენჭისყრის შედეგები:** მომხრე - 27, წინააღმდეგი - 0, თავი შეიკავა - 0.

**დაადგინეს:** დამტკიცდეს ქიმიის, ბიოლოგიის და გეოლოგიის დეპარტამენტებიდან წარმოდგენილი სამაგისტრო და საბაკალავრო ნაშრომების თეზები.

გ) საინფორმაციო-საკომუნიკაციო ტექნოლოგიების განვითარების საფაკულტეტო ცენტრის შექმნის შესახებ. საკითხთან დაკავშირებით ისაუბრა ფაკულტეტის სტრუქტურული ერთეულების კომისიის თავმჯდომარემ, პროფ. ა.შენგელაიამ. მან საბჭოს წევრებს განსახილველად წარუდგინა ფაკულტეტის სტრუქტურული ერთეულის „საინფორმაციო-საკომუნიკაციო ტექნოლოგიების განვითარების საფაკულტეტო ცენტრი“ ჩამოყალიბების საკითხი. შემდეგ პროფ. ა.შენგელაიამ სიტყვა გადასცა პროფესორ მ.ხაჩიძეს. მან მოკლედ ისაუბრა ცენტრის სამოქმედო გეგმაზე (იხ. დანართები 3.3 - ცენტრის დებულება, სამოქმედო გეგმა, სტრუქტურა, თანამშრომელთა სია).

საბჭოს თავმჯდომარემ კენჭი უყარა წინადადებას აღნიშნული ცენტრის შექმნის შესახებ, ამავე დრომ ფაკულტეტის დებულებაში შესაბამისი ცვლილებების შეტანის საკითხს.

**კენჭისყრის შედეგები:** მომხრე - 27, წინააღმდეგი - 0, თავი შეიკავა - 0.

**დაადგინეს:**

- 1) შეიქმნას საინფორმაციო-საკომუნიკაციო ტექნოლოგიების განვითარების საფაკულტეტო ცენტრი;
- 2) ფაკულტეტის დებულების 33-ე მუხლის ბ) პუნქტის შემდეგ დაემატოს გ) პუნქტი შემდეგ რედაქციით: „გ) საინფორმაციო-საკომუნიკაციო ტექნოლოგიების განვითარების საფაკულტეტო ცენტრი.“

ფაკულტეტის საბჭოს თავმჯდომარე,  
ასოცირებული პროფესორი რამაზ ხომერიკი



ფაკულტეტის საბჭოს მდივანი,  
ასისტენტ პროფესორი  
თინათინ დავითაშვილი

